

04 JUL 2002

Najib-TPM

NAJIB TERKEJUT KENYATAAN KEMUNGKINAN TIMBALAN PERDANA MENTERI

ALOR SETAR, 4 Julai (Bernama) -- Naib Presiden Umno Datuk Seri Najib Tun Razak berkata beliau terkejut dengan kenyataan Perdana Menteri Datuk Seri Dr Mahathir Mohamad semalam yang menyebut tentang kemungkinan beliau akan menjadi Timbalan Perdana Menteri.

"Saya terkejut pasal Perdana Menteri cakap cara terbuka," katanya apabila menjawab soalan pada persidangan media selepas menemui jawatankuasa keanggotaan Umno Anak Bukit di Bangunan Tunku di sini.

Apabila ditanya sama ada beliau menganggap kenyataan Dr Mahathir itu sebagai suatu pengiktirafan, Najib berkata:

"Tak tahu nak kata. Kita terima kenyataan Perdana Menteri macam mana biasa kita bagi 'weightage' pada kenyataan Perdana Menteri. Itulah saya kira," katanya.

Semalam ketika berucap pada perjumpaan dengan Jawatankuasa Umno bahagian Kubang Pasu di pejabatnya di Putrajaya, Dr Mahathir berkata: "Sebenarnya kalau saya tak jadi Perdana Menteri, hari ini Pak Lah (Datuk Seri Abdullah Ahmad Badawi) jadi Perdana Menteri dan mungkin Najib jadi Timbalan Perdana Menteri, tetapi mereka sanggup tunggu selama 16 bulan lagi untuk mendapat jawatan itu,"

Ketika ditanya sama ada beliau bersedia untuk menjawat jawatan Timbalan Perdana Menteri kelak, Najib berkata: "Tunggulah bila sampai masanya, kita serahkan pada pucuk pimpinan untuk menentukannya."

Najib berkata semua pemimpin dan anggota Umno ketika ini perlu lebih bekerja dan kurangkan politiking seperti saranan Dr Mahathir yang mahukan tidak ada perebutan kuasa semasa tempoh peralihan kuasa ini.

"Keadaan tidak berubah. Ketika ini Perdana Menteri dan Timbalan Perdana Menteri masih tidak berubah,"

Najib yang juga Pengerusi Jawatankuasa Keanggotaan Umno berkata penambahan anggota parti seramai 500 orang di kawasan Dewan Undangan Negeri Anak Bukit menjadikan jumlah sekarang 6,224 anggota, dan ini memberi kesan yang baik kepada Umno dalam menghadapi pilihan raya kecil kawasan itu.

Pilihan kecil bagi Anak Bukit itu dan kawasan Parlimen Pendang akan diadakan secara serentak pada 18 Julai bagi mengisi kekosongan ekoran kematian wakil rakyatnya Datuk Fadzil Noor, Presiden PAS, pada 23 Jun lepas.

-- BERNAMA

JM NMO